

NBL

STATUT

NEZAVISNE BOSANSKOHERCEGOVAČKE LISTE

Sarajevo, 30. septembar 2017. godine

1. OPĆE ODREDBE

Član 1.

Ovim Statutom uređuju se pravni status, naziv i sjedište, predstavljanje i zastupanje, prava, obaveze i odgovornost člana/ova Nezavisne bosanskohercegovačke liste (u daljem tekstu : NBL), organi, organizaciona struktura, poslovanje, prestanak rada, te ostala pitanja od značaja za rad NBL.

Član 2.

NBL je politička stranka. Njen puni naziv je *Nezavisna bosanskohercegovačka lista*, a skraćeni naziv je NBL. Sjedište stranke je u Sarajevu (ul. Obala Kulina bana br. 24/2).

Član 3.

NBL ima znak, pečat i zastavu. Pečat NBL je okrugao. U njegovom središtu je znak NBL. Puni naziv Nezavisna bosanskohercegovačka lista (i latinicom i ćirilicom) ispisan je u obodnome krugu.

Član 4.

NBL je demokratska politička stranka koja djeluje u skladu sa bosanskohercegovačkim zakonima, te ovim Statutom i programskim dokumentima.

Član 5.

NBL djeluje u Bosni i Hercegovini i inozemstvu. Otvorena je za sve bosanskohercegovačke građane koji prihvataju ovaj Statut i dokumente NBL.

Član 6.

NBL ima svojstvo pravnog lica, koje stiče upisom kod nadležnog organa u skladu sa zakonima BiH.

2. NAČELA I CILJ

Član 7.

NBL djeluje u skladu sa načelima društvene pravde, slobode i jednakosti za sve ljude. Zalaže se za održavanje i razvoj vladavine prava u skladu sa postojećim ustavnim poretom, te mogućnostima njegove promjene u okviru demokratskih procedura u legitimiranju svih oblika vlasti.

Član 8.

Cilj NBL je razvoj bosanskohercegovačkog političkog poretka kao najboljeg interesa bosanskohercegovačkih građana. Najvažniji sadržaji u realiziranju tog cilja su:

- Zagovaranje poželjne političke, kulturne i ekonomske budućnosti bosanskohercegovačke države kao izazovne i privlačne vizije općeg dobra za sve njene ljude;
- Zagovaranje vizije političke budućnosti bosanskohercegovačke države koju će najvitalniji dio njenih građana prihvatiti kao dobro koje je njihovo vlasništvo i koje oni štite i razvijaju;
- Zaštita bosanskohercegovačkog državnog suvereniteta u funkciji osiguranja temeljnih prava bosanskohercegovačkih građana i svih njihovih kolektivnih pripadanja;
- Zagovaranje i zaštita kulture mira i solidarnosti unutar svih oblika pluralnosti bosanskohercegovačkog društva;
- Zagovaranje i razvoj svih oblika saradnje u skladu sa načelima mira, poštovanja i solidarnosti sa svim državama u svijetu, a naročito sa državama u susjedstvu;
- Zagovaranje i podržavanje svih procesa i oblika državnog povezivanja kojima se proširuje politička, kulturna i ekonomska uključenost bosanskohercegovačke države u evropske i svjetske integracijske procese, a prije svega u Evropsku uniju i NATO;
- Realiziranje svih oblika političkog projekta u službi najboljeg interesa građana kao pojedinaca, porodice i svih oblika slobode u pojedinačnim i kolektivnim pripadanjima;
- Optimiziranje odnosa među svim razinama vlasti, ali uvijek na temelju prvenstva interesa pojedinca i njegovog života u lokalnoj zajednici;
- Otklanjanje svih oblika diskriminacije na osnovu rodnog, rasnog, etničkog, vjerskog, seksualnog i generacijskog pripadanja;
- Zagovaranje odgovornosti prema položaju najugroženijih dijelova bosanskohercegovačkog društva (djeca i starci, invalidi i bolesni, itd.);
- Suprotstavljanje svim oblicima otuđenja političke vlasti od najboljeg interesa građana i to u onim okolnostima gdje oni konkretno žive;
- Zagovaranje širenja prostora zakonom garantirane društvene pravde na svim razinama državnog poretka;
- Odlučno suprotstavljanje svim oblicima zloupotrebe političke vlasti u nezakonitim realiziranjima individualnih i grupnih interesa;
- Zagovaranje i zaštita slobode govora i udruživanja na svim razinama društva;

- Zagovaranje i zaštita jednakosti svih bosanskohercegovačkih građana pred zakonom i u pristupu javnim dobrima i službama, uključujući sve službe državnog poretka od mjesne zajednice do državnog predsjedništva;
- Razvijanje i zaštita demokratskih procedura, demokratske kulture i demokratskog legitimiranja svih oblika društvenog organiziranja;
- Zagovaranje i zaštita prava vlasništva i komplementarnih odnosa među različitim oblicima usklađivanja privatnog i javnog područja;
- Rekonstituiranje nepovredivosti prava na privatnost u životu i svojini i to u skladu s evropskim standardima;
- Zagovaranje i zaštita različitih oblika tolerancije, antiradikalizma i uključivosti koji omogućuju načela društvene pravde, slobode, jednakosti i demokratije;
- Valoriziranje i zaštita pluralnog bosanskohercegovačkog kulturnog i prirodnog naslijeđa u skladu s najboljim iskustvima savremenog svijeta;
- Zagovaranje i razvoj sistema obrazovanja u skladu s najboljim iskustvima savremenog svijeta;
- Zagovaranje i razvijanje sistema zdravstvene zaštite u skladu sa najboljim iskustvima savremenih društava;
- Suprotstavljanje svim oblicima djelovanja i korištenja organa vlasti u njihovom otuđenju od konkretnih interesa građana u njihovim pravima na društvenu pravdu, slobodu, jednakost i sudjelovanje u svim postupcima demokratskog odlučivanja.

Član 9.

Načela i cilj/evi NBL navedeni u članu 8. ovog Statuta bit će predstavljeni u programskim dokumentima, donesenim na nadležnim stranačkim organima.

Član 10.

NBL realizira svoj cilj u skladu sa demokratskim procedurama i sudjelovanjem u izborima za sve organe zakonodavne i izvršne vlasti u Bosni i Hercegovini, te u tim organima u skladu s izbornim rezultatima.

Član 11.

NBL može stupati u saveze s drugim političkim organizacijama, te postajati članicom bosanskohercegovačkih i inozemnih asocijacija i to u skladu s bosanskohercegovačkim zakonima.

3. ČLANSTVO

Član 12.

Član NBL može biti svaki punoljetni građanin Bosne i Hercegovine koji nije član druge političke partije.

Član 13.

Članom NBL postaje osoba koja potpiše pristupnicu i tako potvrdi prihvatanje Statuta stranke i programskih dokumenata, a nakon što tako izraženu volju prihvati nadležni stranački organ i tu osobu upiše u Centralni registar članova NBL.

Član 14.

Član NBL ima pravo da bira i bude biran u sve stranačke organe, da bude obaviješten o svim planovima i rezultatima rada.

Član 15.

Član stranke ima obavezu da štiti ugled NBL, da zastupa i širi stranačke stavove definirane ovim Statutom, programskim dokumentima i odlukama organa NBL.

Član 16.

Članstvo u NBL prestaje pismeno izraženom voljom člana, nepoštovanjem ili kršenjem obaveza utvrđenih ovim Statutom i drugim stranačkim dokumentima, učlanjenjem u neku drugu političku stranku, te smrću člana. Svako kome je prestalo članstvo u NBL dobit će pismenu ispisnicu i bit će brisan iz Centralnog registra NBL.

Član 17.

Članovi NBL mogu biti i osobe koje nisu nastanjene u Bosni i Hercegovini, ali imaju status bosanskohercegovačkih građana i pravo sudjelovanja (aktivno i pasivno biračko pravo) na Općim i Lokalnim izborima u BiH.

Član 18.

Mjesto stanovanja u Bosni i Hercegovini ne ograničava pravo učlanjenja u NBL. Dvostruka registracija nije dopuštena.

Član 19.

Registar NBL članova je jedinstven i javan, a vodi ga Sekretarijat NBL.

Član 20.

Članovima NBL člansku kartu izdaje Sektor za stručno vođenje stranke.

Član 21.

NBL član je dužan plaćati godišnju članarinu, o čijem iznosu za svaku godinu odlučuje nadležni NBL organ. Iznosi članarine su diferencirani shodno društvenom statusu članova.

Član 22.

Odluku o oduzimanju ili suspenziji članstva u NBL zbog nepoštivanja ili kršenja obaveza utvrđenih ovim Statutom i drugim NBL dokumentima donosi Predsjedništvo NBL.

Član 23.

Član NBL koji je Odlukom Predsjedništva isključen iz članstva, žalbu na Odluku podnosi Glavnom odboru NBL. Ako isključeni član NBL nije zadovoljan odlukom Glavnog odbora, svoju žalbu može podnijeti Glavnoj skupštini čija Odluka je konačna.

Član 24.

Odluku o isključenju iz članstva isključenoj osobi šalje preporučenom poštom Sektor za stručno vođenje stranke. Pismenu žalbu na Odluku o isključenju potrebno je dostaviti Predsjedništvu NBL najkasnije 15 dana, od dana prijema odluke. Predsjedništvo NBL se izjašnjava o žalbi najkasnije 30 dana od dana prijema žalbe. Sektor za stručno vođenje stranke NBL izjašnjenje Predsjedništva upućuje žalitelju

poštom. Sljedeći prigovor žalitelja višim organima (Glavni odbor i Glavna skupština NBL) moraju biti dostavljeni u roku od 15 dana od dana donošenja odgovarajućih odluka.

Član 25.

a).U slučaju kada to zahtjeva provjerljivi interes NBL, Predsjednik i Predsjedništvo NBL mogu donijeti odluku o suspenziji člana i organa NBL sve do donošenja konačne odluke o žalbi.

b).Svi kandidati NBL koji osvoje i prihvate mandat zastupnika/vijećnika/odbornika u zakonodavnom tijelu, budu imenovani u izvršnu vlast ili na visoke pozicije u agencijama i državnim preduzećima, dužni su potpisati ugovor/izjavu koji je obavezujući, a odnosi se na političko djelovanje u skladu sa Statutom i Programom NBL. Ukoliko zastupnik/vijećnik/ odbornik ili imenovani na pozicije u izvršnu vlast ili na visoke pozicije u agencijama i državnim preduzećima u toku trajanja mandata promijeni stranku ili pređe u samostalne zastupnike/ vijećnike/odbornike bit će isključen iz članstva NBL. Od njega će biti zatraženo i da podnese ostavku na zastupničku/vijećničku/odborničku dužnost, odnosno funkciju u izvršnoj vlasti, ili visoku poziciju u agencijama i državnim preduzećima te da ispuni svoje finansijske obaveze prema NBL, a koje su definirane ugovorom/izjavom.

4. NBL ORGANIZACIJA

NBL u svom sastavu ima dva Sektora i to :

- a) Sektor za političko djelovanje i vođenje;
- b) Sektor za stručno vođenje stranke;

Član 26.

(1) Sektor za političko djelovanje i vođenje stranke je sastavljen od sljedećih organa:

- a) Mjesni odbor;
- b) Gradski/Općinski odbor;
- c) Koordinacioni odbor;
- d) Predsjedništvo i Predsjednik stranke;
- e) Glavni odbor;
- f) Glavna skupština;

(2) Mjesni odbor je osnovna jedinica političkog organizovanja NBL. Mjesni odbor se formira na području mjesne zajednice grada/općine prema trenutnoj organizaciji gradova /općina u Bosni i Hercegovini.

- a) Mjesni odbor se sastoji od:
 - 5 članova, kad na teritoriji mjesne zajednice, u kojoj se formira mjesni odbor, ima do 10 i više aktivnih članova koji imaju prijavljeno prebivalište u mjesnoj zajednici,
 - 10 članova, kad na teritoriji mjesne zajednice, u kojoj se formira mjesni odbor, ima do 30 i više aktivnih članova koji imaju prijavljeno prebivalište u mjesnoj zajednici,

- 15 članova, kad na teritoriji mjesne zajednice, u kojoj se formira mjesni odbor, ima do 50 i više aktivnih članova koji imaju prijavljeno prebivalište u mjesnoj zajednici,
- b) Jedan od članova mjesnog odbora je predsjednik. Predsjednik mjesnog odbora rukovodi radom i vodi sjednice mjesnog odbora.
- c) Članove mjesnog odbora biraju svi aktivni članovi NBL koji imaju prijavljeno prebivalište u mjesnoj zajednici za koju se bira mjesni odbor. Članovi mjesnog odbora biraju predsjednika mjesnog odbora.
- d) Mjesni odbor je zadužen da promovira ideje NBL na teritoriji mjesne zajednice, da radi na popunjavanju NBL novim članovima, da provodi izbornu kampanju na teritoriji mjesne zajednice, da organizuje logističku podršku za posmatrače i praćenje regularnosti izbora na biračkim mjestima u svojoj mjesnoj zajednici, prema planu dostavljenom od Sektora za stručno vođenje stranke.
- e) Mjesni odbor imenuje sekretara mjesnog odbora. Sekretar mjesnog odbora, pored toga što mora biti aktivni član NBL, mora imati i prijavljeno prebivalište u mjesnoj zajednici za koju se imenuje za sekretara mjesnog odbora.
- f) Mjesni odbor ima obavezu održavanja sjednica svakih 15 dana. Mjesni odbor je obavezan najmanje jednom u dva (2) mjeseca održavati sjednicu na kojoj su prisutni i svi članovi NBL sa teritorije te mjesne zajednice, a koji nisu imenovani u organe NBL niti su nosioci mandata ispred NBL na bilo kojem nivou vlasti.
- g) Sekretar mjesnog odbora je zadužen da dostavlja sve materijale članovima mjesnog odbora, da vodi zapisnike sa sjednica mjesnog odbora, da sve izvještaje i zaključke sa sjednica mjesnog odbora dostavlja Sektoru za stručno vođenje stranke, kao i da obavlja sve tehničke poslove koje mu naloži mjesni odbor ili Sektor za stručno vođenje stranke.
- h) Građanin Bosne i Hercegovine koji se želi priključiti NBL, obavezan je mjesnom odboru dostaviti obrazac pristupnice i peti primjerak uplatnice za članarinu (ukoliko želi da bude aktivni član). Građanin Bosne i Hercegovine koji živi izvan Bosne i Hercegovine, kao i građanin koji živi u mjesnoj zajednici u kojoj nema formiran mjesni odbor, obrazac pristupnice i peti primjerak uplatnice za članarinu dostavlja direktno Sektoru za stručno vođenje stranke. Sekretar mjesnog odbora kopiju obrasca pristupnice i kopiju petog primjerka uplatnice dostavlja Sektoru za stručno vođenje stranke, dok original obrasce ostavlja u arhivi mjesnog odbora.
- i) Mandat mjesnog odbora traje jednu (1) godinu
- j) Mandat Sekretaru mjesnog odbora traje pet (5) godina.
- k) Članovima i Sekretaru mjesnog odbora mandat može isteći prije roka propisanog u tačkama i). i J) u slučaju ako član ili sekretar izgubi status aktivnog člana NBL na način propisan u članu **16.** ovog Statuta, ili na zahtjev najmanje deset (10) članova koji ga je izabrao u mjesni odbor.

(3) Gradski / općinski odbor osniva se kad na teritoriji grada/općine imaju uspostavljena najmanje tri mjesna odbora.

- a) Mjesni odbori koji broje : 5 članova imenuju jednog predstavnika, 10 članova imenuju dva predstavnika i 15 članova tri predstavnika u gradski/općinski odbor.

- b) Članovi gradskog/općinskog odbora po automatizmu su načelnik, gradonačelnik, odbornici/vijećnici i zastupnici na svim nivoima zakonodavne vlasti koji su na izborima dobili mandat, te imenovani zvaničnici u izvršnoj vlasti na svim nivoima, a čije je mjesto prebivališta na području tog gradskog/općinskog odbora.
- c) Jedan od članova gradskog/općinskog odbora je predsjednik. Ukoliko, stranka ima svoga načelnika izabranog na izborima, on je i predsjednik gradskog/općinskog odbora.
- d) Gradski / općinski odbor je zadužen da kreira politiku stranke na teritoriji grada/općine. Odgovoran je za organizaciju kampanje na teritoriji općine i organizaciju nadzora provedbe izbora, kao i prikupljanja rezultata izbora na nivou općine prema planu Sektora za stručno vođenje stranke.
- e) Odluke i stavovi gradskog / općinskog odbora su obavezujući za sve nosioce mandata ispred NBL na gradskom/općinskom nivou.
- f) Gradski / općinski odbor zasjeda jednom mjesečno.
- g) Mandat članovima gradskog / općinskog odbora traje dvije (2) godine, a nosiocima mandata na gradskom/općinskom i ostalim nivoima vlasti, mandat u gradskom/općinskom odboru traje do kraja mandata u izvršnoj i zakonodavnoj vlasti.
- h) Gradski odbor imenuje sekretara na period od pet (5) godina
- i) Sekretar gradskog / općinskog odbora je zadužen da dostavlja sve materijale članovima odbora, da vodi zapisnike sa sjednica gradskog / općinskog odbora, da sve izvještaje i zaključke sa sjednica odbora dostavlja Sektoru za stručno vođenje stranke, kao i da obavlja sve tehničke poslove koje mu naloži gradski / općinski odbor ili Sektor za stručno vođenje stranke.
- j) Članovima i Sekretaru gradskog / općinskog odbora mandat može isteći prije roka propisanog u tačkama g). i h) u slučaju ako član ili sekretar gradskog / općinskog odbora izgubi status aktivnog člana NBL na način propisan odredbama ovog Statuta, ili na zahtjev mjesnog odbora koji ga je delegirao u gradski/općinski odbor.

(4) Koordinacioni odbor broji 12 članova koje imenuje Glavni odbor i koji imaju obavezu da koordinišu i uvezuju rad općinskih odbora.

- a) Svi općinski odbori grupišu se po regijama i to :

Regija 1.

Velika Kladuša, Sanski Most, Ključ, Cazin, Bihać, Bosanska Krupa, Bosanski Petrovac, Bužim, Novi Grad, Prijedor, Oštra Luka, Krupa na Uni, Kozarska Dubica, Kostajnica, Prnjavor, Srbac, Gradiška, Laktaši, Istočni Drvar, Kupres RS, Šipovo, Ribnik, Petrovac, Mrkonjić Grad, Banja Luka, Jezero, Čelinac, Kotor Varoš, Kneževo.

Regija 2.

Odžak, Orašje, Domaljevac/Šamac, Doboj Istok, Gradačac, Gračanica, Lukavac, Srebrenik, Čelić, Tuzla, Banovići, Živinice, Teočak, Sapna, Kalesija, Kladanj, Brčko, Bjeljina, Ugljevik, Šamac, Pelagićevo,

Donji Žabar, Lopare, Vlasenica, Zvornik, Šekovići, Srebrenica, Osmaci, Bratunac, Milići, Modriča, Vukosavlje, Brod, Derвента.

Regija 3.

Žepče, Zenica, Zavidovići, Usora, Doboj Jug, Maglaj, Tešanj, Visoko, Breza, Olovo, Kakanj, Vareš, Travnik, Vitez, Novi Travnik, Kreševo, Kiseljak, Jajce, Gornji Vakuf- Uskoplje, Fojnica, Donji Vakuf, Busovača, Bugojno, Dobretići, Teslić, Doboj, Petrovo, Stanari.

Regija 4.

Foča - Ustikolina FBiH, Goražde, Pale - Prača FBiH, Bileća, Ljubinje, Trebinje, Rudo, Novo Goražde, Nevesinje, Višegrad, Kalinovik, Gacko, Čajniče, Berkovići, Foča RS.

Regija 5.

Neum, Mostar, Stolac, Čapljina, Prozor-Rama, Konjic, Jablanica, Ravno, Čitluk, Ljubuški, Posušje, Grude, Široki Brijeg, Drvar, Glamoč, Kupres FBiH, Livno, Tomislavgrad, Bosansko Grahovo.

Regija 6.

Hadžići, Ilidža, Novi Grad Sarajevo, Trnovo FBiH, Ilijaš, Vogošća, Centar Sarajevo, Stari Grad Sarajevo, Novo Sarajevo, Trnovo RS, Han Pijesak, Istočna Ilidža, Istočni Stari Grad, Sokolac, Rogatica, Pale RS.

- b) Za koordinaciju općina iz jedne regije su zadužena dva člana koordinacionog odbora.
- c) Koordinacioni odbor ima obavezu da preuzima sve prijedloge općinskih odbora (svaka dva člana za svoju regiju) za kandidate na entitetskim i kantonalnim nivoima, sve prijedloge za rukovodeća mjesta koja su poslije izbora pripala stranci. Koordinacioni odbor također ima obavezu da preuzima sve zahtjeve prema kantonima ili entitetima od općinskih odbora, a koji se tiču promjene zakonske legislative u cilju poboljšanja funkcionisanja lokalne samouprave, koji putem Glavnog odbora se prenose kao zadaci na sve nosioce mandata iz stranake na nivou entiteta ili kantona.
- d) Koordinacioni odbor ima obavezu da u svom radu komunicira sa svim predsjednicima općinskih odbora i svim nosiocima mandata na kantonalnom nivou, kako bi svoje usaglašene prijedloge dostavljali Glavnom odboru stranke na nadležnost.

(5) Predsjedništvo stranke - Predsjedništvo NBL broji 15 članova, uključujući predsjednika i pet potpredsjednika. Od petnaest (15) članova Predsjedništva stranke najmanje su tri (3) žene.

a) Predsjedništvo NBL :

- Provodi politiku i zaključke Glavne skupštine i Glavnog odbora stranke,
- Donosi stavove u vezi sa aktuelnim političkim pitanjima,
- Po potrebi osniva radna tijela za rješavanje pitanja iz svoje nadležnosti,
- Obavlja druge poslove uređene ovim Statutom.

b) Predsjednik NBL :

- predstavlja i zastupa NBL u javnom, političkom životu i pravnom prometu, pridržavajući se zakonskih rješenja i Statuta;
- saziva i vodi sjednice, te potpisuje akte Predsjedništva NBL;
- nadzire provođenje odluka i drugih akata Predsjedništva NBL, daje naloge Direktor stranke u provođenju odluka Stranke u skladu sa Statutom, te nadležnim tijelima NBL predlaže mjere u slučaju njihovog nepoštivanja ili neprovođenja,
- daje ovlaštenje drugoj osobi za davanje izjava za javnost u ime NBL;
- obavlja i druge poslove utvrđene ovim Statutom.

Predsjednik je za svoj rad odgovoran Glavnoj skupštini stranke.

c) Potpredsjednici NBL :

- Obavljaju zadatke iz nadležnosti za koju su određeni, a koje će svojom Odlukom bliže regulisati GO NBL,
- Provode zaključke organa NBL,
- Predstavljaju i zastupaju NBL po ovlaštenju.

Mandat Predsjednika, zamjenika Predsjednika i članova Predsjedništva NBL traje tri (3) godine.

(6) Najviši organ NBL između dvije sjednice Glavne skupštine je Glavni odbor NBL.

- a) Glavni odbor se sastoji od : osamnaest (18) članova koje imenuje Glavna skupština na svojoj sjednici na način da se iz svake regije iz stava (4) ovog člana imenuje po tri (3) člana i od svih nosioca mandata na državnom i entitetskom nivou.
- b) Izuzetno od odredbe tačke a) ovog stava Glavni odbor može imati i po jednog člana iz države u kojoj žive državljani BiH, a u kojoj ima stotinu ili više aktivnih članova NBL.
- c) Glavni odbor ima jednog predsjednika kojeg biraju članovi Glavnog odbora.

6) Glavni odbor:

- saziva Glavnu skupštinu i vrši pripreme za njeno održavanje,
- bira predsjednika Glavnog odbora,
- bira Direktora stranke i odobrava sistematizaciju Sektora za stručno vođenje stranke,
- rukovodi Strankom između dvije sjednice Glavne skupštine i brine o izvršavanju odluka Glavne skupštine,
- daje političke ocjene i utvrđuje političke stavove NBL na državnom, entitetskom i kantonalnom nivou,

- donosi opće akte Stranke,
- donosi odluku o načinu izlaska Stranke na izbore na državnom, entitetskom i kantonalnom nivou,
- usvaja godišnji budžet Stranke i izvještaj o ostvarenju budžeta,
- usvaja planove i izvještaje o poslovnoj aktivnosti i politici NBL,
- daje saglasnost o osnivanju odbora Stranke u inostranstvu,
- donosi odluku o osnivanju stručne službe, preduzeća, agencije ili drugih oblika obavljanja privredne djelatnosti,
- po potrebi osniva radna tijela za rješavanje pitanja iz svoje nadležnosti (komisije, savjeti i sl.),
- na prijedlog Predsjedništva stranke imenuje predsjednike i članove Nadzornih odbora preduzeća čiji je većinski vlasnik stranka,
- ocjenjuje statutarnost akata i odluka organa NBL,
- daje tumačenje Statuta NBL,
- odlučuje i o drugim pitanjima vezanim za rad NBL, koji Statutom ili drugim općim aktima nisu stavljena u nadležnost drugim organima.

c) Glavni odbor se sastaje po potrebi a najmanje dva puta godišnje. Glavni odbor može punovažno odlučivati ako mu prisustvuje dvije trećine (2/3) članova, a odluke se donose natpolovičnom većinom glasova prisutnih.

d) Predsjednik Glavnog odbora:

- priprema, saziva i predsjedava sjednicom Glavnog odbora
- predlaže sastav komisija koje formira Glavni odbor,
- stara se o provođenju politike i odluka Glavnog odbora,
- predstavlja stranku po ovlaštenju i zastupa njene interese.

e) Mandat predsjedniku i članovima Glavnog odbora traje pet (5) godina. Mandat u Glavnom odboru nosiocima mandata ističe gubitkom mandata na državnom ili entitetskom nivou, odnosno nastupa početkom mandata na državnom ili entitetskom nivou.

7) Glavna skupština je najviše programsko, statutarno i izborna tijelo NBL.

a) Glavnu skupštinu sačinjavaju: predsjednici svih gradskih/općinskih odbora, članovi Koordinacionog odbora, predsjednik, potpredsjednici i članovi Predsjedništva stranke, predsjednik i

članovi Glavnog odbora i svi nosioci mandata u zakonodavnoj i izvršnoj vlasti na nivou kantona , entiteta i državnom nivou.

b) Glavna skupština se održava svake godine.

c) Glavna skupština NBL:

- ustanovljava cjelokupnu politiku stranke, razmatra i ocjenjuje cjelokupno djelovanje stranke i Predsjednika stranke između dva zasjedanja Glavne skupštine,

- razmatra i usvaja Izvještaj o radu Glavnog odbora i Predsjednika stranke u periodu između dva zasjedanja Glavne skupštine

- donosi i mjenja Statut stranke,

- donosi programske akte stranke „ Bosna i Hercegovina u 22. vijeku“ i „ Put do ostvarenja cilja“.

- bira i razrješava članove Glavnog odbora na osnovu prijedloga Koordinacionog odbora,

- bira i razrješava Predsjednika i potpredsjednike NBL i članove Predsjedništva NBL,

- usvaja Poslovnik o radu Glavne skupštine NBL,

- donosi rezoluciju i druge dokumente, definira osnovne političke aktivnosti NBL,

- donosi odluke, zaključke i stavove.,

- razmatra i druga pitanja vezana za NBL i druge poslove predviđene ovim Statutom,

- dodjeljuje priznanja pojedincima, tijelima te pravnim i drugim osobama za doprinos u radu NBL.

d) Glavna skupština može punovažno odlučivati ako joj prisustvuje 2/3(dvije trećine) delegata sa pravom glasa. Glavna skupština odluke i druge akte donosi natpolovičnom većinom glasova od ukupnog broja prisutnih delegata.

e) U slučaju nepostojanja natpolovične većine glasova u prvom krugu kod izbora Predsjednika i potpredsjednika stranke i članova Glavnog odbora pristupa se drugom krugu izbora.

f) Na osnovu prethodnih konsultacija i prijedloga Koordinacionog odbora, te Predsjedništva i Predsjednika Stranke, Glavni odbor NBL daje prijedlog kandidata za izbor Predsjednika Stranke, potpredsjednike stranke te Glavni odbor Stranke. Bliže odredbe o postupku i načinu izbora organa NBL, uređuje se Poslovnikom o radu Glavne skupštine.

g) Glavna skupština donosi odluku o prestanku rada NBL, kao i odluku o udruživanju sa drugim strankama.

h) Odluke iz prethodne tačke su punovažne ukoliko ih prihvati dvotrećinska većina ukupnog broja prisutnih delegata Glavne skupštine. Odlukom o prestanku rada Stranke ili udruživanja uređuje se i pitanje obaveza raspolaganja i raspodjele imovine NBL.

Član 27.

(1) Sektor za stručno vođenje stranke sastoji se od :

- Direktora stranke,
- Odsjeka za finansijsko poslovanje stranke,
- Odsjeka za kadrovska vođenje stranke,
- Odsjeka za kampanju i provedbu unutarstranačkih izbora za kandidate liste, te kampanju i provedbu redovnih izbora u BiH,
- Odsjeka za pravne poslove i izradu zakona,
- Odsjeka za informisanje

(2) Direktor stranke nadležan je za :

- Rukovođenje Sektorom za stručno vođenje strankom,
- Predlaganje budžeta Sektora za stručno vođenje stranke,
- Predlaganje Glavnom odboru Stranke, Pravilnika o sistematizaciji radnih mjesta u Sektoru za stručno vođenje stranke,
- Upošljavanje osoblja u Sektoru,
- Vodi podatke o svim članovima Stranke i inicira izborne sastanke članova stranke kad se stvore uslovi za formiranje određenog organa stranke,
- Donosi uputstvo za kampanju i unutarstranačke izbore za kandidatske liste, kampanju na redovnim izborima u BiH,
- Donosi propise za posmatranje redovnih izbora u BiH i prikupljanje izbornih rezultata,
- Podnosi mjesečni izvještaj organima Stranke o stanju sredstava na računu Stranke i vrši prijenos sredstava organima na osnovu odredbe Statuta,
- Vodi poslovanje stranke i upravlja njenom imovinom,
- Izradu i provođenje plana edukacije svih aktivnih članova NBL.
- Predlaganje nacrta zakona: Glavnom odboru na državnom nivou, Glavnom odboru na entitetskom nivou i Glavnom odboru na kantonalnim nivoima, koji moraju biti u skladu sa programskim aktima iz ovog Statuta.

(3) Mandat Direktora Stranke traje pet (5) godina i jedna osoba može obnašati funkciju Direktora Stranke najviše dva puta.

5.KLUBOVI ZASTUPNIKA-VIJEĆNIKA-ODBORNIKA

Član 28.

Kandidati NBL izabrani u organe zakonodavne vlasti na redovnim izborima na bilo kojem nivou formiraju klub zastupnika- vijećnika-odbornika NBL. U sastav kluba zastupnika- vijećnika-odbornika NBL mogu pristupiti samostalni i nezavisni zastupnici- vijećnici-odbornici kao i drugi zastupnici- vijećnici-odbornici koji postanu aktivni članovi NBL, ukoliko postoji zakonska mogućnost za isto.

Član 29.

Članovi kluba zastupnika- vijećnika-odbornika NBL iz svojih redova , uz saglasnost Predsjedništva NBL za državni nivo, za entitetski nivo, za kantonalni nivo i Gradskog /Općinskog odbora za gradski/općinski nivo, biraju predsjednika. Klub zastupnika – vijećnika-odbornika NBL donosi Poslovnik o svom radu, na koji saglasnost daje Predsjedništvo NBL za državni nivo, za entitetski nivo, za kantonalni nivo i Gradski/Općinski odbor za gradski/općinski nivo.

6.POSLOVANJE NBL I FINANSIRANJE STRANKE

Član 30.

(1) NBL stiče finansijska sredstva i ostalu imovinu od članarine, finansijske i materijalne pomoći članova i simpatizera, iz budžeta, vlastite djelatnosti i drugih izvora.

(2) Imovina NBL se sastoji od novca, pokretnih stvari, nekretnina, vrijednosnih papira i prava.

(3) NBL može biti osnivač i suosnivač preduzeća i drugih subjekata za obavljanje privredne i druge djelatnosti. Kad je zakonom dopušteno NBL može neposredno obavljati privrednu djelatnost.

(4) Direktor NBL upravlja imovinom i vodi poslovanje stranke, te u ime NBL ispunjava prava i dužnosti koje proizilaze iz položaja osnivača preduzeća ili drugog oblika privredne aktivnosti.

Član 31.

(1) NBL ima glavni KM i devizni račun na koji liježu sredstva iz svih izvora finansiranja propisanih u članu 30. stav 1. regulisan ovim Statutom.

(2) Podračun glavnog KM računa imaju: Sektor za stručno vođenje stranke, Predsjedništvo NBL, Koordinacioni odbor i Gradski/Općinski odbor.

(3) Na kraju svakog kalendarskog mjeseca, Direktor NBL sa glavnog računa prebacuje na podračun : Sektora za stručno vođenje stranke 50% sredstava, Koordinacionog odbora 20% sredstava , a sva ostala sredstva prebacuje na podračun Predsjedništva NBL.

7.KANDIDATSKE LISTE NBL

Član 32.

(1) Kandidatske liste NBL, za sve niveoe vlasti za koje se provode redovni izbori u BiH, se formiraju najkasnije do kraja kalendarske godine, prije godine u kojoj se provode redovni izbori.

(2) Kandidate za kandidatsku listu za gradsko/ općinsko vijeće odnosno Skupštinu grada/ općine predlažu mjesni odbori. Broj predloženih kandidata mjesnog odbora zavisi od broja članova mjesnog odbora i taj broj za svaki mjesni odbor za lokalne izbore utvrđuje Direktor NBL.

(3) Kandidate za kandidatsku listu Načelnika Općine i Gradonačelnika predlaže Gradski / općinski odbor i na kandidatskoj listi moraju biti najmanje tri (3) kandidata.

(4) Kandidate za kandidatsku listu za kantonalni nivo predlažu Gradski / općinski odbori iz tog kantona. Broj predloženih kandidata Gradskog / općinskog odbora zavisi od broja članova Gradskog / općinskog odbora i taj broj za svaki Gradski / općinski odbor za opće izbore utvrđuje Direktor NBL.

(5) Kandidate za kandidatsku listu za entitetski nivo predlažu Gradski / općinski odbori za izbornu jedinicu u kojoj se nalaze. . Broj predloženih kandidata Gradskog / općinskog odbora zavisi od broja članova Gradskog / općinskog odbora i taj broj za svaki Gradski / općinski odbor za opće izbore utvrđuje Direktor NBL.

(6) Kandidate za kandidatsku listu za državni nivo predlaže Glavni odbor na osnovu usklašenih prijedloga Koordinacionog odbora.

(7) Kandidate za člana Predsjedništva BiH predlaže Predsjedništvo NBL . Predsjedništvo NBL na kandidatsku listu za člana Predsjedništva BiH iz reda jednog od konstitutivnih naroda , na osnovu trenutnog ustavnog uređenja BiH , mora predložiti najmanje tri (3) kandidata.

(8) Na kandidatsku listu za Načelnika i Gradonačelnika i gradsko/ općinsko vijeće odnosno Skupštinu grada/ općine u ime NBL dolaze kandidati koji dobiju najviše glasova od svih aktivnih članova NBL, a za druge niveoe glasaju članovi mjesnih odbora , gradskih / općinskih odbora. Redosljed na kompenzacijskim listama , za niveoe koji imaju kompenzacijske liste, utvrđuje se brojem glasova sa redovnih listi.

(9) Procedure za kampanju i izbore za kandidatske liste propisuje Direktor NBL svojim uputstvom.

8.PRESTANAK RADA STRANKE

Član 33.

(1) Prestanak članstva u NBL , prestanak rada ili raspuštanje organizacionih oblika ne dopušta nikome bilo kakvo pravo na imovinu NBL.

(2) NBL može prestati djelovati odlukom Glavne skupštine, za koju je potrebna dvotrećinska većina glasova ukupnog broja delegata Glavne skupštine. Odlukom o prestanku rada stranke Glavna skupština će odlučiti o imovini NBL.

9.POSEBNE ODREDBE

Član 34.

(1) Svi organi u NBL su samostalni u svom radu i obavezni su da provode politiku Stranke za nivo za koji su nadležni, kao i da kreiraju i podržavaju sve zakonske norme koje u konačnici vode ka stvaranju Bosne i Hercegovine onakvom kakva je opisana u programskom dokumentu propisanom u ovom Statutu.

(2) Organi stranke su obavezni da poslije osnivanja donesu svoje Pravilnike o načinu rada, koji moraju biti u skladu sa Statutom.

(3) Glavni odbor ima mandat, da ukoliko neki od organa NBL ne poštuje programske ciljeve stranke, poništi odluke i zaključke tog organa i smjeni sve članove tog organa koji su glasali za osporene odluke i zaključke.

(4) Predsjednici i Sekretari: mjesnih odbora, gradskih / općinskih odbora, članovi Koordinacionog odbora , Predsjedništva stranke i Glavnog odbora imaju pravo na mjesečnu naknadu za svoj angažman u stranci.

(5) Odluke o visini naknade iz stava (4) ovog člana donose: gradski / općinski odbor za nivo općine, Glavni odbor za Predsjedništvo i Koordinacioni odbor.

(6) Pozicije predsjednika organa stranke može jedna osoba obavljati u dva mandata, osim u slučaju predsjednika gradskog /općinskog odbora kada NBL ima u tom gradu / općini Načelnika i za sve vrijeme trajanja mandata Načelnika ta osoba je ujedno i Predsjednik gradskog/ općinskog odbora.

(7) Propis iz stava (6) ovog člana odnosi se na jedan organ. Jedna osoba može biti u dva mandata predsjednik mjesnog odbora i da dalje bude predsjednik nekog većeg organa Stranke.

10.ZAVRŠNE ODREDBE

Član 35.

(1) Statut NBL stupa na snagu danom donošenja i ne može se mijenjati narednih 10 godina.

PREDSJEDAVAJUĆI OSNIVAČKE SKUPŠTINE
